

[0215]

3. *D. M. B. F. S. S. T. E. P. S.* hat in fers skreaun *Oon dy bystere gaauwe en vorstannige Jan fen Dotingh* yn de grinzer *Disputatio juridica inauguralis de injuriis* fan *Johannes a Dotingh* (1731A). As wy de oare poëtyske lokwinsken dy't de jonge doctor utriusque juris meikrige hat efteryn syn disputatio, ris neijer bisjogge, dan falt ús each al moai gau op it latynske ûnderskrift fan in hollânsk fers fan Theodorus Mentis: *Sic populari popularis amicitiae ergo litare debuit T. Mentis S. S. Th. & Phil. Stud.* It wurdt ús dúdlik, dat wy de letterkombinaesje fan de dichter fan it fryske fers yn twaën lêze moatte: *D. M. B. F.* en *S. S. Th. & Phil. Stud.* Neffens it twadde stik moat de skriuwer dus in theologysk studint wêze. Mar it boppe oanhelle ûnderskrift helpt ús noch fierder. *D.M.B.F.* sil wol lêzen wurde moatte as *D. M. B. Filius*, en der is neat gjin biswier tsjin om D.M. oan to foljen ta *Durk Mentis*. *Durk* (of *Dirk*) is de fryske wjergera fan *Theodorus*. Yn it fryske fers oan Theodorus Tadema (1698A) wurdt *Theodorus* hieltyd *Dirck* neamd, en yn ien oan Theodorus Huyghens (1698B) stiet *Durk* foar *Theodorus*. Ek yn de *Nomina propria Hollandorum, Antverpiæ. Anno 1657*, wurdt *Dirck* oanjown as wjergera fan *Theodorus*. Neffens de *Naamlijst* fan Romein is Theodorus Mentis de soan fan Hillebrandus. As ús eardere ûnderstellingen krekt binne, sille wy dus foar *B. F.* lêze moatte : *Brant Filius*, soan fan Brant. Theodorus Mentis is op 3 april 1726 ynskreaun yn it grinzer matrikel mei de tafoeging: *Art Lib., Gratis in honorem patris*. Ik haw yn dizze jierren gjin oare fryske stu-

dinten yn it grinzer matrikel fine kinnen, dêr't de initialen *D.M.* op slaen kinne. En it fryske fers moat dus wol fan *Theodorus Mentis* wêze.

Neffens Romein is Theodorus Mentis as kandidaat bifêstige yn Raerd-Jirnsum op 15 july 1736. Wy lêze dêr fierder, dat er berne is yn Burgum 21 febr. 1712, „Hillebrandus zoon, Mentis broeder te Benschop, . . ., nam als proponent den dienst 9 maanden waar voor dominé P. Boudaan te Amsterdam, en overleed den 24 Julij 1773. Zijne zonen Hillebrandus te Leeuwarden, Occo te Langweer en Albertus te Harlingen." Theodorus Mentis hat in hollânsk fers skreaun yn *Jes. Hillenius, De mensch beschouwt in de staat der elende, der genade en der heerlijkheit. Eerste stuk* (Leeuw. 1751). Op de P.B. yn Ljouwert fine wy boppedat noch fan Th. Mentis: *Ter bruiloft van Mento Mentis, predikant te Benschop en Johanna Visch, te Benschop den 7 Sept. 1750. Utr. 1750.*

*Tony Feitsma.*